

高等
中小
各校修身科暨
家庭教育用
市鄉宣講

寰球名人德育嘉話

俞復敬署



敘文

無錫楊君章甫。以所撰寰球名人德育嘉話。寄徵祥於海外。徵祥讀而善之。曰。偉哉。楊君之志也。德育者。基於家人父子。而其量彌綸於萬國。語曰。爲人子止於孝。爲人父止於慈。與國人交止於信。余周遊海外。見賢士大夫衆矣。其議論政治法律異同之故。聞之諗矣。要而言之。未有子不孝。父不慈。交不信。而可以立國者。是故學術政治其流也。孝慈信其源也。其所以然者何也。曰。適而已矣。麻縷絲枲爲質。不同而求適於體。則一穀麥菽粟爲類。不同而求適於口。則一孔孟耶穆爲道。不同而求適於治。則一是故子之道適於孝。父之道適於慈。交友之道適於信。如是則安。不如是則危。如是則存。不如是則亡。止也者。適而已矣。孝慈信云者。繫乎其人之詞。統括其說。則曰。道德曰仁義。充道德仁義之極。而天下無不治矣。往者中外隔閼。互相詆訾。及乎交通。繁情志。浹幡然。各悟嚮者所見之非。於是巴黎羅馬。設漢文漢學博士。弟子吾國好學深思之士。亦蘄溝通同異。凡政治法律以至藝術音樂之屬。靡不博綜竝貫。以爲學問之道。無古今。無中外。雖然。學無古今。有精粗。無中外。有難易。求其

辨析精而會通。易者其惟道德之說乎。楊君被服儒素。本所躬行發揮而通貫之。其爲言也。正而不迂。通而不雜。博而不泛。可謂卓然豪傑之士也。已或曰。今宗教之派多矣。孔子之道。其果爲萬國所尊信乎。曰。歐美人士服膺孔孟之教者。日多靡不心悅誠服。誠以論孟六經。以布帛菽粟之文。揭修己治人之要。各國大教育家大政治家之精理名言。舉不能外此。故西人翕然無間言。又東西列國甚重陽明良知之學。以其根據大學。慎獨。孟子不忍人擴四端之說。簡要明白。易知。易從。深得孔氏家法。故也是書之簡要。易從。亦復如之。其將風行萬國。爲孔教之先驅乎。

中華民國十一年三月上海陸徵祥謹敘

敘文

易繫辭云。居其室。出其言善。則千里之外應之。言出乎身。加乎民。行發乎邇。見乎遠。言行君子所以動天地也。孝經云。非法不言。非道不行。口無擇言。身無擇行。言滿天下。無口過行。滿天下。無怨惡。嘗讀而深思之。竊嘆吾人之言行。關係天下國家之治亂。如形影焉。今吾國之亂。亦亟矣。兵戈雲擾。饑饉荐臻。俗敝民窮。外交棘手。駸駸有載胥及溺之勢。推其所以致此者。厥在人心。而人心之顛倒是非。何莫非道德不講。言行紕繆。寢尋以及於此耶。然則救之之道。要在舉國官紳。提倡德育。俾吾民修其身。謹其言行而已。魯論云。道之以德。齊之以禮。有恥且格。程明道云。治天下以正風俗。得賢才爲本。海忠介云。爲政以轉移風俗爲首。曾文正云。塞橫流之人慾。以挽厭亂之天心。庶幾有補。又云。君子之道莫大乎以忠誠爲天下倡。歷觀往訓。則重德育以張國勢。非當今之急務乎。余竊不自揆。十數年來。恒欲以明倫重道爲天下先。輒歎同志之士少。而恐其力之不勝也。吾邑楊章甫先生。以所著寰球名人德育嘉話見示。且屬爲叙。余觀其書。淺而彌深。簡而彌旨。將於無形之中。陶淑天下之性情。知

其濟世之心苦矣。詩云：君子如祉，亂庶遄已。所望當世賢士大夫，皆如楊先生之提倡德育，以移風易俗，履中蹈和，俾吾國人民之言行一出於正軌，而無入於歧途，則吾國之亂庶可遄已乎。壬戌春，正唐文治謹叙。

敍文

有虞氏卽學藏。皋。命曰庠。以教孝。養。夏后氏以射。造士。命曰序。以檢其行。殷人以樂。造士。命曰瞽宗。以成其德。周人修而兼用之。園橋璧水。命曰辟雍。講學親師。於是焉。在。而又有國學。州序。黨庠。之制。有三德。三行。六藝。六儀。之教。凡黌校皆德育之地也。戴記有言。溫柔敦厚爲詩教。疏通知遠爲書教。廣博易良爲樂教。絜靜精微爲易教。恭儉莊敬爲禮教。屬辭比事爲春秋教。凡六經皆德育之書也。孔子授孝經。舉立身齊家之規。教養治平之畧。一切歸之純孝。榮親孟子七篇發揮義利仁暴性善之旨。有功世道甚鉅。以至董江都之賢良策。陸宣公之奏議。周濂溪之通書。王陽明之傳習錄。楊忠愍曾文正之家訓。均有關治術學術。而其人道德經濟亦足以翼名教而式士林。凡聖賢儒先皆提倡德育之人也。泰西學規整肅英傑踵興其教育。大家恒集先哲嘉言懿行以爲躬行篤踐津逮後學之資。時則有若蘇格拉底以內省爲入德之門。談道義而傳哲學。有若柏拉圖以謹慎剛勇克己廉直四端爲道德之基礎。有若格蘭斯頓手錄日記飭行謹言卒爲大政治家。發抒正義博愛之素志。有若華

盛頓輯經典格言至數十百條時時誦讀以撿攝身心有若富蘭克林訂修身條目十有三當座銘以自警如違背某條卽施墨點於其下之數公者或教澤誕敷或勛名震鑠全球仰其芳型學校傳爲軌範西人之重德育如此余友楊章甫先生著有寰球名人德育嘉話蒐羅富抉擇精而議論純正融會中西道德爲一俾學者有所遵循誠列諸學官家絃戶誦安知黃農神明之胄不重覩睦嫺親遜之風爲歐美敦育家所則倣也因喜而爲之敘

民國十一年一月世愚弟鄧以模識

敘文

中國文化肇自五千年前。非惟政治、藝學先於萬國。尤以德育爲開天明道之基。試徵之軒轅書契、律算、井牧、蠶桑、舟車、貨幣。所以創制顯庸者。備矣。而傳教有臺成均有學。實樹明倫崇德之先聲。試再徵之唐虞水火、農刑工虞禮樂。所以制度考文者。詳矣。而舉八元使布五教。父義母親。兄弟恭子孝。尤有輔翼振德之妙。用試三徵之成周官禮三百六十。屬自體國經野之典。以逮冠婚喪祭之儀。燦然秩然。至司徒掌邦教。則重六德六行而六藝次之。試四徵之鄒魯孔門列政事文學諸科。德行實爲弁冕。其訓弟子之規。先孝悌謹信而後學文。孟子七篇曰謹庠序之教。申以孝悌之義。曰入孝出悌。以待後之學者。曰其子弟從之。則孝悌忠信上下數千年間。君相師儒之教。靡不歸於德育。全球推教化最先之邦。職是故也。泰西科學發達。曠古無倫。究其立國之根源。建學之精神。仍不離乎德育。各國教育大家若蘇格拉底若史邁爾若斯賓塞若卡萊若馬維克。其持論立說皆準道德而歸倫理。曰良知曰人格。即大學正心修身之功也。曰家庭曰服從。卽內則事親後長之禮也。曰保種曰博愛。

卽無逸。懷保小民之隱也。曰遜讓。曰自制。卽周易謙卑自牧之道也。曰敬崇。曰誠實。卽魯論忠信篤敬之訓也。曰堅毅。曰憤心。卽中庸發彊剛毅之義也。以上德育各條。西人奉爲金科玉律。證之吾國聖經賢傳。若合符契。可見率性修道之教。無古今中外一也。族叔祖章甫先生。學粹品端。睠懷時局。謂教育爲濟國之本。道德又爲教育之本。乃編輯寰球名人德育嘉話一書。爲各校修身科用。羅載籍極博之菁英。而蹈艱深支離之病。萃五洲萬國之銘訓。而一掃町畦門戶之私。其滿腔寬洪惻怛體天地生物之心。以爲心。亦卽聖人有教無類大道爲公之心也。余旣付印。以廣流傳。復歷敘德育之重要。亘古今達中外。無有乎弗同。無有乎或變。而各國容有偏而不舉之處。方今文軌大同。孔教之大。中至正。漸被全球。會當不遠。或以是編爲前驅之導乎。余日望之矣。謹敘。

中華民國十年十二月楊壽枏敘於津門寓廬

敍文

粵稽載籍。邈化之昌。明英髦之師。濟遠推勳。華近推豐。鎬靡不以德育爲兢兢。舜命契敬敷五教。爲建學明倫之濫觴。命夔教胄子。直而溫。寬而栗。剛而無虐。簡而無傲。所以陶淑其德性者。美矣備矣。周禮大司徒之職。以鄉三物教萬民。而賓興之一曰六德。智仁聖義中和二曰六行。孝友睦婣任卹三曰六藝。禮樂射御書數。先德行而後六藝。其重德育可知。師氏掌以三德三行教國子。保氏掌養國子。以道而教。以六藝六儀。本末兼該。秩然不紊。其時風俗不變。賢傑雲蒸。三五之隆。海內昇平。數百千載。全球推爲教化最先之邦。德育爲之也。後世如漢光武。唐太宗。宋藝祖。明太祖。均興學崇道。而治隆俗嫻。國祚綿長。歷代大儒如胡瑗。許衡。陳敬宗等。主講國學。咸以道誼相切。劘得人。號稱極盛。德育收效於吾國。旣如此。泰西巒校星羅。視德育尤爲重要。其個人之道德曰克己曰戒慾曰忍耐曰廉潔。此消極之道德也。曰良心曰勵志曰篤實曰敏捷。此積極之道德也。其團體之道德曰敬讓曰博愛曰正直曰勤懇。此對於社會之道德也。曰忠誠曰愛國曰盡職曰勇敢。此對於國家之道德也。其有

不道德。不名譽之事。則爲學校所屏絕。爲通國所不齒。故人人爭自濯磨。敦信尚義。才良不可勝用。毗庶安俗。樂業德育收效於各國。又如彼子與子云。壯者以暇日修其孝悌忠信。可撻秦楚之堅甲利兵。西哲梅森云。捍衛國家之眞力量。儲於國人有道德之性質中。殷曼孫云。一國文化之標準。非其戶籍之稀繁也。非其物產之豐耗也。乃其人民之品格耳。中西聖哲名言。若合符節。已鍾鈺前譯歐美德育嘉話一書。爲東西列國中小學師範女師範各校修身科通用課本。備載歐美格言。琦行以示後學。津梁茲就原編提要。芟繁參仿。朱子小學劉忠介人譜體例。更博採全球嘉懿。合爲一編。顏曰寰球名人德育嘉話。爲各學校修身科及家庭教育。市鄉宣講之用。因歷敘德育關係之重。功效之鉅。中外習慣雖殊。公理與良知初無少異。實爲寰球大同之朕兆。竊望各省官紳及教育界諸君子。熱忱提倡德育。以樹智育體育之基。培養賢才。與善俗更望莘莘學子。多識前言往行。以蓄其德。胥蔚爲朴誠幹濟之才。則三五之郅治。歐美之隆軌。其何遠哉。是爲叙。

中華民國十年十一月楊鍾鈺叙於吉長寓齋

寰球名人德育嘉話目錄

卷一 倫理嘉話

父子篇

愛國篇

夫婦篇

昆弟篇附家規

師友篇

睦婣篇

卷二 從政嘉話上

勤政篇

禦災篇

敬教篇附崇聖

禮賢篇附旌善

興利篇

勸工篇

卷三 從政嘉話下

廉正篇

賞罰篇附課吏

軍紀篇

弭亂篇

卹刑篇

薄斂篇

卷四 紳商嘉話上

鄉治篇

敬畏篇附樂天

忠信篇附主僕

好學篇

樂育篇

著述篇附

改良小說戲曲

堅毅篇

卷五 紳商嘉話下

仗義篇

禮讓篇

商業篇

節儉篇附衛生

勤敏篇

德怨篇附寬閔

卷六 巾幗嘉話

孝親篇 宜家篇

教子篇附 慈他子

仁恕篇 節烈篇 賢達篇

卷七 克復嘉話

改過篇 戒色篇

戒訟篇

戒妄語篇

戒濫取篇

戒離婚篇附 完骨肉

戒烟酒賭篇

卷八 利濟嘉話

公益篇附 交通

宣講篇附 義學

瞻孤悼篇

憫疾篇

卹死篇

愛物篇

寰球名人德育嘉話

卷一 倫理嘉話

無錫楊鍾鈺編輯

父子篇

鍾鈺按春秋傳云父慈子孝小雅云父兮生我母兮鞠我撫我畜我長我育我欲報之德昊天罔極千古言孝莫切於此孔子授孝經云身體髮膚受於父母不敢毀傷孝之始也立身行道揚名後世以顯父母孝之終也又云孝悌之至光於四海無所不通孟子云至孝莫大乎尊親大孝終身慕父母列聖至德要道無出孝之外者西哲蘇格拉底云不孝父母而盡情於他人無益也卡匿奇云最親愛最仁慈者無如我之雙親披却路云余兩親之洪恩雖建黃金之紀念碑高矗雲表未足言報魯斯金云凡幼孩能對其父母誠實不欺將來必成偉器旨哉言乎是編博採全球孝行明孝友根於性天推而放之四海而準聖人孝治天下不過因人心之同然而寰球大同之盛導源於此已

海鹽楊太宰巍母夫人壽至百四歲巍事母至孝每朝罷閉門絕請謁侍母飲食搔摩扶掖如孺子然後乞養歸嘗於春日爲村裝負母迤邐行花叢中歡娛竟日菓食餅餌皆親進不

以假婢妾也。林居享天倫之樂者幾二十年。

漢申屠蟠九歲喪父。不進酒肉者十餘年。每忌日輒三日不食。廬於冢側。同郡縱氏女玉爲父報讐。殺夫氏之黨。外黃令論殺玉。蟠年十五爲諸生。進諫曰。玉之節義足以感無恥之孫。激忍辱之子。不遭明時。尙當表旌廬墓。況在清聽而不加哀矜。令善其言得減死論。後漢書

明馮行可之父恩任南京御史。疏劾大學士張孚敬下獄。論死行可年十三。伏闕訟冤。日夜匍匐長安街。見冠蓋者過。輒攀輿號呼乞救。明年冬。事益迫。行可刺臂血書疏。謂臣父幼而失怙。祖母吳守節教育底於成立。得爲御史。圖報無地。私憂過計。陷於大辟。祖母吳年八十餘。憂傷之深。僅餘氣息。若臣父今日死。祖母吳亦必以今日死。冀陛下哀憐。置臣辟而赦臣父。謹延頸以俟白刃。帝覽之惻然。遽遣戍雷州。遇赦還。恩年八十一卒。明史

秦文恭公蕙田至性過人。本生父以藩志事牽連訟繫十餘年。間檻車南北。炎雨酸風。公隨侍膝下。下方營護。既通籍。伏闕陳情。乞以身贖言。至痛楚。遂有寬釋之詔。給諫公優游林下者又十年。時與桐城方恪敏公並稱二孝。蓋恪敏每歲徒步省其父於戍所也。先正事略

王尙書熙性篤孝。十二歲母梁夫人病革。禱於天。願減算益母壽。父文貞公晚歲好遊常徧歷西山諸勝。公恐其勞於登陟。乃構怡園於宅西偏。蒔芍藥數百畦於豐台別墅。文貞公顧而樂之。比捐館舍。公年踰五十矣。號泣如孺子。顏書屋曰。慕齋待兄弟友愛布政使然。巡撫

燕金衢道照皆以公推蔭起家者也

同上

美總統華盛頓之父奧佳斯生四子而妻死續娶馬利褒生五子華盛頓其長也馬利褒撫前子如己出整理家政教育子女咸有法度華盛頓年十三而孤母命入校勤學守規矩慎言行絕不爲不道德之事其前母兄魯連士爲覓得一海軍少尉缺喜極欲赴職其母恐染海軍奢縱習不許往華盛頓祇順無違兄歿遺妻及幼女華盛頓養生送死足慰兄嫂之心後被舉爲大統領歸語其母母愀然曰吾老且病殆以今與汝訣汝往哉速奉行天命華盛頓涕泣不忍去母昂之乃行後得報母死華盛頓大慟急命駕歸舉行葬儀國人以華盛頓母賢且生令子福國家甚尊敬之故聞其喪也咸爲感泣

少年叢書

美總統林肯純孝性成父湯思麥受地墾荒母南雪夫人親教林肯讀書家貧以木葉爲紙鵝毛管爲筆又教以敬禮愛國之人不可殘殺動物林肯如教母疾革詔林肯曰余別爾逝矣余知爾能孝爾父其勉爲善人林肯泣識不敢忘後爲總統勛德蓋世猶曰余得力於母教也母逝後林肯日有思思其母夜有夢夢其母逾年父續娶普希夫人林肯侍奉勤謹得繼母歡心恒助其父伐木耕田暇則習書史誦法典二十一歲於法可得自主林肯不忍離其父仍朝夕侍養每念其母遺命輒肅然如左右云

同上

美國富蘭克林之父裘賽亞前妻有子女七人續娶福爾吉氏有賢德生子女六人富蘭克

林其季也。家祇小屋。四間。兄弟十三人。其母教誨飲食撫之如一。諸子亦不辨孰爲所出。終日聚處。並頭促膝。轉覺相親。夜寐則縱橫枕藉。有姜家大被之風。後富蘭克林撰父母行狀略曰。吾父母春風和氣。沴戾爲消。從無疾病。生平耿介。非義不取。家雖貧。未嘗有戚戚容。二老皆享遐齡。父八十九。母八十五。教子治家皆有法度。爲鄉邦軌範。有德者必有福壽云云。禮運云。父子篤。兄弟睦。家之肥也。富氏勲業震寰區。其肇基於此乎。少年叢書

吉勳年十一。遭母憂。水漿不入口。父爲原鄉令。爲奸吏所誣。逮詣廷尉。罪當大辟。勳乃搗登聞鼓。乞代父命。梁主疑爲人所教。敕廷尉卿蔡法度訊之。法度盛陳微纒。厲色問之。對曰。不忍見父極刑。所以上千萬。乘今欲委骨泉壤。此非細故。奈何受人教耶。法度乃和顏誘之。對曰。凡鯢鯀螻蟻。尙惜其生。況在人斯。但囚父必正刑書。故思殞仆。冀延父命。今瞑目引領以聽。大戮無言。復對法度具以聞。上宥其父罪。前五代梁書

史立庵先生大成。貳宗伯時。同人議裁孝子節婦給廩。曰。彼分內事。何與朝廷。先生毅然曰。爲子不孝。爲婦不貞。亦何與朝廷。必以法繩之。耶議遂寢。先生性至孝。會其父思之令。先生繪已容寄父。先生聞命驚怵。乃上疏曰。臣父思子不見思。見子之儀容。臣而忍此。不可爲人子。亦何以爲人臣。世祖覽奏。憫然特許。終養。清代名臣軼事

施愚山先生講學白鷺書院。一日講長幼有序。因自言。少年孤露。終鮮兄弟。至於啜泣座中。